

15 APR 2002

Negara-Gulung (Luar)

MALAYSIA MAIN PERANAN AKTIF BAIKI STRUKTUR PENTADBIRAN OIC

KUALA LUMPUR, 15 April (Bernama) -- Malaysia, yang mengetuai Jawatankuasa Penstrukturan Sekretariat Pertubuhan Persidangan Islam (OIC), memainkan peranan aktif dalam memberi sumbangan idea dan kepakaran bagi membaiki struktur pentadbiran pertubuhan itu.

Timbalan Menteri Pendidikan Datuk Abdul Aziz Samsuddin berkata Malaysia, yang diberi mandat itu sejak Jun tahun lepas, akan menyempurnakan tugasnya sebelum ia menjadi tuan rumah kepada Sidang Kemuncak OIC ke-10 pada 23 hingga 25 Okt 2003 di Kuala Lumpur.

"Yang Amat Berhormat Perdana Menteri (Datuk Seri Dr Mahathir Mohamad) selaku pemimpin yang berwibawa yang akan menjadi Pengerusi Sidang Kemuncak ke-10 negara-negara OIC akan dapat membuat beberapa perubahan untuk membawa OIC ke mercu kejayaan," katanya semasa menggulung perbahasan usul terima kasih di atas titah ucapan Yang di-Pertuan Agong bagi pihak Kementerian Luar di Dewan Negara di sini, hari ini.

Malaysia akan menjadi Pengerusi Sidang Kemuncak Negara-negara Islam pada tahun 2003 hingga 2006.

Mengenai Tabung Kemanusiaan Rakyat Palestin yang dilancarkan baru-baru ini, Abdul Aziz berkata tabung itu dapat mengumpul kira-kira RM51,000 dan barangan bernilai RM25,000.

Mengenai saranan supaya hubungan Malaysia-Singapura dikaji semula, Abdul Aziz berkata umumnya hubungan kedua-dua negara itu baik tetapi sebagai negara berjiran dan saling bergantung kepada satu sama lain, terdapat isu dua hala yang sentiasa wujud dan perlu ditangani.

Dalam menangani isu berkaitan, kedua-dua negara perlu mencari penyelesaian secara aman untuk faedah bersama, katanya.

Mengenai bekalan air ke republik itu, beliau berkata Malaysia telah mengemukakan cadangannya dan kedua-dua negara dijangka mengadakan rundingan tidak berapa lama lagi.

Abdul Aziz berkata kerajaan sentiasa memantau perkembangan kerja-kerja penambakan laut yang dilakukan Singapura di samping memastikan tindakan negara itu tidak mendatangkan mudarat kepada negara ini.

Katanya kerajaan berpendapat Singapura perlu mengambil kira kepentingan Malaysia sebagai jiran terdekat mereka dan mengelakkan daripada membuat tindakan yang hanya memberi kebaikan kepada mereka sahaja.

-- BERNAMA

HS HS NAK